



Cuira, ils 13 da december 2022

Communicaziun a las medias

## 7avla sairada grischuna rumantscha en Chasa federala

Gruppa parlamentara «lingua e cultura rumantscha»

La gruppa parlamentara «lingua e cultura rumantscha» e la Lia Rumantscha envidan a la 7avla sairada grischuna rumantscha ils 14 da december 2022 en Chasa federala a Berna. La gruppa parlamentara «lingua e cultura rumantscha» è vegnida fundada il 2013 a chaschun dal giubileum da 75 onns rumantsch sco lingua naziunala. Ella ha var 90 commembras e commembers e vegn presidiada dal president dal Cussegl naziunal *Martin Candinas* (AdC/GR).

La 7avla sairada grischuna rumantscha dat la chaschun da dar in sguard sin l'onn 2023, in onn impurtant per il rumantsch. Ils 20 da favrer èsi 85 onns ch'il rumantsch è vegnì reconuschì l'onn 1938 sco ina da las quatter linguas naziunalas. Durant l'entir onn vegn il rumantsch ad avair ina ferma preschientscha en la politica federala. Cun il president dal Cussegl naziunal *Martin Candinas* è suenter 37 onns puspè in Grischun e Rumantsch a la testa da la Chombra gronda.

Autras tematicas centralas da la saira èn la diaspora e la transfurmaziun digitala. En il rom da la missiva da cultura da la Confederaziun 2021-2024 ha la Lia Rumantscha creà cuminanze rumantschas en tschintg citads da la Svizra tudestga per pussibilitar ad uffants e giuvenils in access a purschidas da furmaziun rumantschas. Areguard la transfurmaziun digitala prenda la Lia Rumantscha en mira il svilup da programs da correctura en ils tschintg idioms ed en rumantsch grischun sco er in program da translaziun accessibel libramain.

Er il settavel inscunter da la gruppa parlamentara «lingua e cultura rumantscha» vegn organisà da la Lia Rumantscha – per l'emprima giada sut il timun da las co-presidentas *Urezza Famos* e *Gianna Luzio*. La sairada ha lieu en preschientscha dal president da la Confederaziun *Ignazio Cassis* e da la presidenta dal Cussegl dals chantuns *Brigitte Häberli-Koller*.

7avla sairada grischuna rumantscha  
mesemna, ils 14 da december 2022  
suenter la fin da la sesida dal parlament  
en la Galerie des Alpes da la Chasa federala